

FEDERIKO KRUTWIG EUSKALTZAIN DEKANOAREN ERRAUTSAK IZARO INGURUAN HAIZATU ZITUZTEN

«Ohore zuri, Federico, denboren errematean»

■ Federiko Krutwig euskaltzain dekanoa zenaren errautsak Izaro uhartearen inguruan haizatu zituzten atzo eguerdian. Aurretik Euskaltzaindiak, Jakintza Baithak eta Euskal Idazleen Elkarteak gorazarre apal bat egin zioten berak oso maite zuen Laidan.

Gorane Agirre / Laida

HILAREN 15ean zendu zen Federiko Krutwig euskaltzain bizkaitarrari omenaldi xume bezain beroa egin zioten atzo berak horrenbeste maite zuen Laidako hondartza ondoan; bere lan bat baino gehiago daude kokatuta Urdaibaiko txoko horretan.

Euskaltzaindiak, Jakintza Baithak eta Euskal Idazleen Elkarteak antolatutako gorazareak euskaltzain, senide, euskaltzale eta adiskideak bildu zituen haren errauts kutzaren inguruan. Besteak beste, Henrike Knörr, Andres Urrutia eta Jose Antonio Arana Martija euskaltzainak, Andolin Eguzkitza Euskal Idazleen Elkartearen lehendakaria, Josu Lavin eta Manu Ertzi-lla Jakintza Baithako kideak, Jose Luis Alvarez Enparantza Txillardegia eta bere emazte Jone Forcada, Laura Mintegi, Juanjo Pujana eta Alfonso Irigoien zenaren alarguna bertaratu ziren.

Emanaldiari ohorezko aurrekuarekin eman zioten hasiera, eguerdiko 12:00etan. Ondoren, Henrike Knörr euskaltzainburordeak hartu zuen hitza, eta denon oroimenean geratuko den «gizon handi eta leial, euskaltzale, abertzale eta intelektual handi» legez definitu zuen.

Lasai bizitzeko gizona ez zela nabarmendu zuen Knörrek, haren barrenean hainbat ideia eta hausnarketa egosten baitziren. Hori dela eta, euskaltzain dekanoa zenaren paperak gal eta sakabana ez daitezen eta haren oroimenak bizirik iraun dezan,



Omenaldi beroa egin zioten atzo Krutwig zenari. Jone Forcada, Txillardegia eta Juanjo Pujana ageri dira argazkian.

MIKEL MARTINEZ

Euskaltzaindiak bere esku dagoen guztia egingo duela adierazi zuen.

Izarotik Greziara • Euskaltzainburordearen ostean, Josu Lavinek eta Manu Ertziak Krutwigen *Opharia* izenburuko poematxo irakurri zuten, euskaraz eta grekeraz. *Ezen neu soilik hitza naiz, bainan zuek ekhaintza eta egileak. Huntara ba dakikezue zer den egiteko.*

Azkenik, Andolin Eguzkitzak

XX. mende amaiera honetan Federiko Krutwigek «euskarari eta euskal kulturari duintasuna eta esperantza» eman diela azpimarkatu zuen, «aurrera egin eta munduko herri guztiak batera lan egiteko». Idazleen elkartearen buruak honako berbokin agurtu zuen euskaltzain zena: «Ohore zuri, Federico, denboren errematean».

Jon Lopategiren bertsoek amaiera eman zioten emanaldi xumeari. Honela kantatu zuen:

«Greziaraino helduko da gaur / Izaro aldeko ura / Han eta hemen bardin delarik / zure errautsen esangura / Herri guztiak mamitu dairen / euren sustraie kultura / justizie eta bake erreguak / Euskal Herriak mundura».

Ondoren, Anton Artiñano, Krutwigen lagun mina, arduratu zen txalupa batean Izaroko uharteraino hurreratu eta bertan haren errautsen zati bat haizaratzear; izan ere, beste zati bat Grezian haizatuko dute. X

Haur kantuen bidezko metodo pedagogiko bat aurkeztu du Ikas pedagogi zerbitzuak

■ Seaska, Ikas-bi eta Euskal Haziak sareetako erakasle talde batek landu du

Eneko Bidegain / Uztartitze

IKAS euskal pedagogia zerbitzuak *Kantiruri* izeneko konpak-tua eta liburuxka argitaratu ditu metodo pedagogiko baten laguntzaz. Graxi eta Pantxika Solorzanoren 25 kantu berri biltzen dituen bildumaren helburua da 2 eta 5 urte bitarteko haurrekin musika, psikomotrizitatea eta euskara lantzea. Konpaktuarekin batera metodo pedagogikoaren gidaliburu bat ere aterata da, bereziki erakasleentzat egina.

Lan hau Seaskako, Ikas-biko eta eskola gixtinoetako erakasle batzuen artean eramana izan da. Xan Errotabehere Ikas-eko

lehendakariaren hitzetan, «euskarak batu» ditu. Kantuak Graxi eta Pantxika Solorzanok landu dituzte. Lehena euskarako erakasle da ama eskolan; bigarrena musikako erakasle da. Graxi Solorzanok dio «zaila» dela euskararen erakastea, «hizkuntza arrotza bilakatu baita hemengo haurrentzat». Horregatik, hizkuntza baten erakastea, «baitzepadakoa da haurrekin kantuz aritzea», horrela hizkuntzaren egiturak eta hiztegia naturalki sartzen direlako.

Euskalkiaren aldetik, kantuak «Lapurdikoa euskalkian» egitea erabaki dute Solorzano ama-alabek. Haien iduriko, orain arte sail

horretan dagoen materialean, «Hegoaldeko euskara» dute. Baina azpimarratu dute hizkuntza herriko haurrei irakasten zaiela eta garrantzitsua dela etxean, aitaxi-amaxirekin —eta zenbait kasutan, burasoekin— erabiliko duten euskalki hori ikastolan edo eskolan ere ikasi eta erabiltzea, betiere euskara batua baztertu gabe.

Lan honen egiteko Europako dirulaguntza ukan du. Halaber, euskal kulturaren sustengatzeko sindikatuak, Pirineo Atlantikoe-tako kontseilu nagusiak, Akita-niako kontseiluak eta Frantziako Hezkuntza Ministerioak lagundu dute. X

Postontzietako publizitatea arautzeko eskatu du Eguzkik Donostian

■ Buzoi bakoitzean kilo bat publizitate sartzen dute hilero

Erredakzioa / Donostia

EGUZKI talde ekologistak protesta ekingia egin zuen atzo Donostiako udaletxe atarian, bertako herritarrek euren postontzietan jasotzen duten «publizitate oldeari» aurre egin eta gaiari buruzko araudia osatzeko hiriko agintariek duten «utzikera» salatzeko.

Ekologistek publizitatez jositako hiru metroko kartoizko zuhaitz bat jarri zuten udaletxeko sarrera nagusiaren parean. Eguzkiko ordezkarien esanetan, Donostiako gutunontzi bakoitzean sartzen dituzten publizitate orriak egiteko horrelako zuhaitz erdi bat erabili behar izaten da.

Talde ekologistak egin duen azterketaren arabera, gutunontzi bakoitzean kilo bat publizitate sartzen dute hila-bete bakoitzeko; batez beste, 64 publizitate orri. Gipuzkoako hiriburuan dagoen gutunontzi kopurua kontuan hartuta, publizitatean 700 tona paper erabiltzen da Donostian. Paper hori guztia egiteko, 30.000 zuhaitz eta 140 milioi litro ur erabili behar dira.

Hori guztia aztertu eta gaia arautzeko 1996ko uzatailean Eguzkik proposamena egin zion Udalari. Erantzunik jasotzen ez zutela ikusita, hurrengo urtarrilean beste proposamen bat egin zuten ekologistek, baina hari ere erantzunik ez zieten eman. Hala, bada, joan den urtarrilean postontzietako publizitatea arautzeko ordenantza bat aurkeztu zuten. Eta oraindik ordenantza hori aztertzen hasi ote diren ere ez daki Eguzkik. X



OKINDEGIA
ETA
GOZOTEGI
ETXEKOAK

MARCO S
panificadora

• Ubarburu P. 4-5 Pabilioiak - Pol. 27 Industrialdea - Telf.: 943 45 09 66 - ASTIGARRAGA